

Communicaziun a las medias dal cussegl dal public SRG.R

La moderaziun dal Radio Rumantsch è chausa da gust

Cuira, 17-05-2016: En la seduta dal matg 2016 è il cussegl dal public SRG.R (CDP SRG.R) sa fatschentà tranter auter cun l'interacziun tranter il public e la moderaziun dal Radio Rumantsch.

Per analisar la moderaziun èn vegnidas prendidas sut la marella differentas emissiuns. Per la pli gronda part han las singulas moderaturas ed ils singuls moderaturs dal Radio Rumantsch pudì satisfar e persvader il CDP SRG.R.

La moderaziun dal Radio Rumantsch è adina puspè tema da discussiun. Per il pli è quella chausa da gust e da preferenzas personalas, e las moderaturas ed ils moderaturs vegnan era recepids differentamain da persona a persona. Il CDP SRG.R ha perquai prendì sut la marella en spezial l'interacziun, q.v.d. il barat direct tranter moderatur ed auditor, e quai en las emissiuns «Kikeri6», «Tge chaussas», «Gratulaziuns» e «Semperverds/Top3». Las novas moderaturas ed ils novs moderaturs persvadan cun ina preschientscha spontana che pledenta franc e segir er in public pli giuven. Malgrà quai crititgescha il CDP SRG.R la cumpetenzia linguistica, ha dentant era chapientscha per ils svilups en la «cultura linguistica» che na sa ferman era betg quai che pertutga il linguatg rumantsch.

Cun ina buna cultura da feedback e cun scolaziun correspudenta da las moderaturas e dals moderaturs duai vegnir cuntanschida ina meglieraziun udibla da l'interacziun cun il public. In'avischinaziun successiva a la lavur pretensiusa sco er ina buna scolaziun ed in stretg accumpagnament da las novas moderaturas e dals novs moderaturs è medemamain in garant per ina lavur da qualitad. Il CDP SRG.R beneventa questas stentas e constatescha era che las mesiras han in effect positiv sin la moderaziun.

D'impurtanza per il CDP SRG.R è er il fatg che auters auditurs na vegnan betg exclus en situaziuns da dialog. Medemamain duess esser avant maun ina tscherta distanza tranter moderatur ed auditor, ed era la sfera privata da las personas pertutgadas sto vegnir respectada. Cun satisfacziun constatescha il CDP SRG.R dentant che las moderaturas ed ils moderaturs persvadan en general era quai che pertutga l'interacziun, il discurs cun il public.

Offerta supplementara RTR+

Il CDP SRG.R ha era tractà l'offerta da SmartTV da RTR e constatà che RTR+ porscha al public ina buna plivalur. En spezial vegn apprezia l'access a las novitads e la pussaivladad da pudair consumar la porschida da RTR da tuttas uras. La cumplettaziun ed il schlargiament successiv da la porschida da RTR+ vegn beneventada.

RTR+ cumbinescha la televisiun tradiziunala cun l'internet, pussibilitescha l'access sin Play RTR ed è accessibel via ils emetturs da SRF 1 e 2, RSI 1 e 2 sco era RTS 1 e 2. Il CDP SRG.R deplorescha ch'igl è betg pussaivel da distribuir RTR+ en l'entir territori, ed uschia en la plipart da las chasadas.

Prevista

En la seduta dal settember 2016 sa fatschenta il CDP SRG.R cun l'emissiun «Sil punct». Questa emissiun vegn emessa per l'emprima giada la stad 2016 sin SRF 1. I sa tracta d'ina emissiun d'actualitad da la Televisiun Rumantscha en format curt che vegn realisada sco project da pilot. Medemamain tracta il CDP SRG.R en la proxima seduta la moderaziun dal «Telesguard».

Infurmaziuns davart il Cussegl dal public SRG.R

Il Cussegl dal public è in gremi independent e consultativ, che accompogna la lavur da program ed il svilup dal program da Radiotelevision Svizra Rumantscha (RTR) cun observaziuns e propostas. Il Cussegl dal public fa per regla quatter sedutas ad onn. El observa programs, emissiuns ed era contribuziuns online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembras e commembers.

Per dumondas ubain ulteriuras infurmaziuns:

Michael Spescha, president Cussegl dal public SRG.R, mobil 079 486 58 47

Anna Maria Ratti, secretariat SRG.R, telefon 081 255 79 79